

Politica da famiglia senza receipts


Jacqueline Fehr emprova da formular strategias cunter problems da famiglia

■ (anr/vi) La cuverta è captivanta ed era il titel tuna bain: «Luxus Kind? Vorschläge für eine neue Familienpolitik» Ma quai che la cussegliera nazionala Jacqueline Fehr tracta en ses nov cudesch, è plitost ina resumaziun da blers fatgs enconuschents. Il text sin la cuverta empermetta propostas concretas, co ch'i saja da schliar ils problems che las famiglias han oz. Las propostas da Fehr restan dentant pauc precisas. Ellas tunan sco furmlas generalas. En mintga chapitel repeta Fehr che las dunnas cun uffants pitschens èn surchargiadas cun la lavur a chasa ed ordaiifer il dachasa. Ella scriva che bleras famiglias crodan en la povradad, sche la mamma chala da lavurar, cura ch'ella survegn in uffant. Quests mecanissem mussa Fehr a maun da statisticas e declera il svilup istoric. Ma receipts concrets per cumbatter la povertà da famiglia mancan en il cudesch.

Tuttina porscha il cudesch ina buna survista davart la situaziun da las famiglias svizras. Il cudesch è ina buna resursa d'informaziun. Igl è in cudesch da lavur dal qual ins po era leger be singuls chapitels.

Exempel da l'antieriura DDR

Cura che Fehr ha cumenzà a sa deditgar a la politica da famiglia è ella vegnida crititgada. Quai saja ina occupaziun per dunnas che veglian tegnair liber la via als umens che possian lura sa profilar en tematicas politicas pli impurtantas. Tenor Fehr è la politica da famiglia dentant essenziala per noss futur. En la famiglia vegnan ils uffants sosialisads ed emprendan las pli impurtantas chaussas per pli tard. Perquai èsi per Fehr intollerabel che bleras famiglias vivan a l'ur da



l'existenza e che uffants muntan in factur da risico da povertà.

Pervi da la veglia repartiziun da rollas - che sa mantegna en Svizra pli ditg - dat ti tar nus paucas canortas. Entras quai èsi anc adina fitg difficil per las mammas da gudagnar daners. Bleras dunnas, cunzunt academicas, renunzian ord quest motiv d'avair uffants. E gist mammas ch'educheschan sulettas èn periclitadas pli fitg da ruschnar sut il minimum d'existenza.

In exempel statistic ord la Germania mussa che canortas gidassan a schliar il problem: En territoris da l'antieriura DDR existan pli bleras canortas. Las statisticas mussan ch'i dat là pli paucas mammas sulettas che crodan sut il minimum d'existenza.

Las tattas lavuran per milliardas

En Svizra surpiglian las tattas ed ils tats la pli gronda lavur da tgira d'uffants ordaiifer la famiglia. Las tattas prestan radund 100 milliuns uras lavur ad onn. «Quai corrispunda al volumen da lavur da tuts emploiads da la posta e da la telecomunicaziun», scriva Fehr. I saja era dapli uras che tut ils scolasts primars prestian. Sch'ins pajass be ina remuneraziun modesta a las tattas, vargass la summa totala da paga gia ina milliarda francs.

Fehr menziunescha che questa furma da tgira saja savens era problematica: «La dependenza da geniturs, da sir e sira po engrevgiar la relaziun en la parentella.»

La mamma sco cau-staziun

En il chapitel davart las uras da bloc en scola mussa Fehr ch'il sistem dals uraris dad oz sa basa anc sin la veglia idea che mammas stoppian adina star a disposiziun: «La spetga che las mammas hajan

da beneventar e trametter ils uffants quasi sco in cau-staziun è derasada en las scolass.»

Las autoritads fetschian adina valair ch'ins haja memia paucs daners e memia paucas stanzas da scola per realisar il temp da bloc. «Davos quests arguments sa chatta dentant il maletg tradiziunal da rollas.» Las dunnas na duain betg concurrenzar ils umens sin il martgà da lavur è la finamira zuppada.

Ina introducciun dal temp da bloc en scola spargnass l'avertura da bleras canortas. «Igl è ina absurditad da bajegiar si per blers daners chars plazs da tgira per uffants, sche la varianta la pli favuraivla - il temp da bloc - na vegn betg realisada.»

Jacqueline Fehr: "Luxus Kind? Vorschläge für eine neue Familienpolitik". Orell Füssli. 200 paginas. 29,80 francs. Turitg 2003. ISBN 3-280-05027-8.